

BRČKO DISTRIKT
BOSNE I HERCEGOVINE
V L A D A



БРЧКО ДИСТРИКТ
БОСНЕ И ХЕРЦЕГОВИНЕ
В Л А Д А

ИНФО

Oktobar / Studeni / Децембар, 2022. god.



Одобрен Насрт одлуке о одобравању Приједлога стратегије заштите животне средине 2022-2032

Vlada Brčko distrikta Bosne i Hercegovine na 75. redovnoj sjednici odobrila je Nacrt odluke o odobravanju Prijedloga strategije zaštite životne sredine Brčko distrikta BiH za period 2022/2032. godine na prijedlog Odjeljenja za prostorno planiranje i imovinskopравne poslove.

Naime, prijedlog Strategije zaštite životne sredine Brčko distrikta BiH za period 2022/2032. godine pripremljen je od strane Štokholmskog instituta za zaštitu životne sredine u okviru projekta ESAP 2030+, te obuhvata sedam tematskih oblasti: upravljanje vodama, upravljanje otpadom, biodiverzitet i zaštita prirode, kvalitet zraka, klimatske promjene i energija, hemijska sigurnost i buka,

održivo upravljanje resursima kao i upravljanje životnom sredinom.

Na prijedlog Ureda za prevenciju korupcije i koordinaciju aktivnosti na suzbijanju korupcije u Brčko distriktu BiH, Vlada je usvojila Odluku o usvajanju Strategije za borbu protiv korupcije kao i Akcioni plan za provođenje strategije za borbu protiv korupcije u Brčko distriktu BiH za period od 2022. do 2024. godine.

Strategija i Akcioni plan usmjereni su ka najvišim strateškim mjerama koje se odnose na oblast prevencije, otkrivanja, procesuiranja, koordinacije, represije, poboljšanja zakonodavnog okvira, povećanja kapaciteta institucija, obuka i podizanja javne podrške za borbu protiv korupcije.





Gradonačelnik Kadrić otvorio Internacionalne teatarske susrete u Brčkom

Gradonačelnik Brčko distrikta Bosne i Hercegovine Esed Kadrić otvorio je Internacionalne teatarske susrete u Brčkom poželjevši dobrodošlicu prisutnima u ispunjenoj sali Doma kulture.

U svom obraćanju Kadrić je kazao da se za ovogodišnje održavanje brčanskih teatarskih susreta omogućila ponuda koja je prisutna u mnogim teatrima u regionu te je zadatak selekcije predstava povjeren uglednom profesoru i glumcu Vladi Keroševiću.

„Brčko je ponosno na svoje teatarske susrete i mi čuvamo ovu tradiciju svake godine. Ponosni smo

što se Brčko promovise kao zajednica kulture, s obzirom na činjenicu da se mnogo govori o našem gradu u kulturnim krugovima“, naglasio je Kadrić.

Također, u okviru pratećeg programa Internacionalnih teatarskih susreta otvorena je I pozorišno-dokumentarna izložba u Gradskoj galeriji pod nazivom „Teatarski duh dramologije na prelazu vijekova“ čiji su autori Srđan Vukadinović i Jakov Amidžić.

Teatarski susreti, trajali su od 20. 10. do 28. 10. 2022. godine.



Upriličen prijem djece u Vijećnici povodom Međunarodne sedmice djeteta



Gradonačelnik Brčko distrikta Bosne i Hercegovine Esed Kadrić zajedno sa zamjenikom dr. Antom Domićem i šefom Odjeljenja za obrazovanje Zoranom Bulatovićem upriličio je prijem za učenike osnovnih škola s područja Distrikta i djecu iz obdaništa „Naša djeca“ povodom obilježavanja Međunarodne sedmice djeteta. Nakon pozdravnih riječi, uslijedilo je upoznavanje i razgovor s prisutnom djecom, podijelili su kojim profesijama se žele baviti te su gradonačelniku Kadriću, zamjeniku Domiću i šefu Bulatoviću postavili pitanja

koja su za njih pripremili. Izrecitovali su pjesmice, iskazali srdačne želje za budućnost nakon čega su zajedno sa gradonačelnikom obišli Gradsku vijećnicu.

Međunarodna sedmica djeteta je tradicionalno događanje koje se održava svake godine u prvoj punoj sedmici oktobra s ciljem da se podsjetite odrasli na potrebe i prava djeteta, posebno položaj djeteta u zajednici u kojoj živi, raste i razvija se. Ove godine obilježen je pod sloganom „Sretan možeš biti svijete samo ako je zdravo i sretno dijete”.

Zvanično predstavljen Akcioni plan „Zeleni gradovi“ za Brčko distrikt BiH

Nakon što se Brčko distrikt Bosne i Hercegovine u oktobru 2021. godine pridružio programu „Zeleni gradovi“ Evropske banke za obnovu i razvoj potpisivanjem Memoranduma između Vlade Distrikta i EBRD-a, zvanično je predstavljen Akcioni plan „Zeleni gradovi“ za Brčko distrikt BiH. Tim povodom, prisutni su imali priliku pogledati prezentaciju o procesima izrade i očekivanim rezultatima ovog plana.

Predstavljanje projekta ozvaničio je svojim obraćanjem gradonačelnik Brčko distrikta BiH Esed Kadrić, kazavši da je opći cilj izrade Akcionog plana „Zeleni grad“ pružanje podrške Distriktu da postane četvrti grad u Bosni i Hercegovini koji je stupio u istoimenu mrežu, zajedno sa oko 50 gradova širom Evrope, za što je istakao iskrenu zahvalnost Vladi Italije koja je putem Centralne evropske inicijative finansirala izradu Akcionog plana, kao i EBRD-u.

On je dodao da Vlada nastavlja raditi po dosadašnjem planu u svrhu poboljšanja života svih građana Distrikta što uključuje dovršavanje započetih projekata komunalne infrastrukture, rekonstrukciju i izgradnju saobraćajnica i putne signalizacije, kanalizacione i vodovodne mreže, kao i poboljšanje elektronaponske mreže i uvođenje LED rasvjete.

Zlatan Musić, šef Jedinice za implementaciju

projekata iz međunarodnih fondova, Razvojno-garantni fond Brčko distrikta BiH, objasnio je ukratko koncept spomenutog Akcionog plana.

„Akcioni plan zelenih gradova obuhvata 134 konkretna indikatora koji se rade po istoj metodologiji, metodologiji Evropske banke za obnovu i razvoj koja se implementira u 52 grada u zemljama Evropske unije i omogućit će da se u osam osnovnih oblasti definišu konkretni prioriteti i mjere koje će biti namijenjene razvoju Distrikta. Neke od tih oblasti su zaštita vazduha, tla, vode, također neke od tih oblasti uključuju i energetska efikasnost, dekarbonizaciju i slično“, istakao je Musić.

Manuela Naessl, direktorica Ureda Evropske banke za obnovu i razvoj u BiH, iskazala je svoje zadovoljstvo ovim projektom koji će trajati oko 12 mjeseci. „Distrikt se do sada pokazao kao veoma odličan i mi smo već uradili prve investicije koje se odnose na „Luku Brčko“ kao i vodovodne mreže u Distriktu. Tu ima izazova s kojima se susrećemo, ali vjerujemo da ćemo u narednom periodu to sve riješiti zajedno. Nadamo se da ćemo ostvariti jako dobru saradnju u narednom periodu s Distriktom, a također pozivamo i sve građane, zainteresovane strane da se uključe aktivno u ovaj projekat“, izjavila je direktorica Naessl.



Отворена изложба „Заједничка умјетност Балкана традиција и савременост“

У галерији Градске вијећнице отворена је изложба под називом „Заједничка умјетност Балкана традиција и савременост“ која је организована у сарадњи Владе Брчко дистрикта Босне и Херцеговине и Амбасаде Републике Бугарске у Босни и Херцеговини. Ради се о изложби фотографија и графике са IV међународног омладинског фестивала назива „Ријека толеранције“ у склопу Пројекта „13 вијекова Бугарске“. Градоначелник Дистрикта Есед Кадрић отворио је изложбу заједно са амбасадором Републике Бугарске у БиХ Њ. Е. Валери Иванов Јотов и представником Пројекта, госпођом Мигленом Гиговом.

„Изложба је потврда једне добре сарадње коју су власти Дистрикта оствариле са Амбасадом Републике Бугарске, првенствено на културном пољу, а имамо намјеру да врло скоро размијенимо искуства у области привреде и тако проширимо сарадњу кроз заједничке привредне пројекте“, казао је у

свом обраћању градоначелник Кадрић.

Амбасадор Јотов захвалио се градоначелнику на првој успјешно реализованој сарадњи, исказавши наду за будућом сарадњом. „Разговарао сам са градоначелником о важности наше регионалне сарадње и надам се да ће ускоро бити реализована сарадња између Дистрикта, града Софије и Агенције за мала и средња предузећа Бугарске“, истакао је амбасадор.

Миглена Гигова, представница Пројекта, исказала је своје задовољство што се поменута изложба по први пут излаже управо у Брчком, граду који је изузетан примјер за толеранцију у БиХ и регији. „Ова изложба има 30 слика које имају графике у којима су учествовали студенти из Букурешта, Грчке, Бугарске и Србије, а надамо се да ће у идућој учествовати и омладина из Босне и Херцеговине“, изјавила је Гигова.



Vlada o transportnom cjevovodu Plazulje-Potočari

Vlada Brčko distrikta Bosne i Hercegovine okončala je 79. redovitu sjednicu usvajanjem prijedloga Odjela za zdravstvo i ostale usluge u vezi sa Smjernicama za izradu nacrtu Zakona o zaštiti mentalnog zdravlja. Cilj donošenja ovog Zakona jeste omogućavanje provođenja međunarodno utvrđenih standarda zaštite u području mentalnog zdravlja, kao i da se građanima Distrikta osigura pravo na zaštitu mentalnog zdravlja putem mjera promocije mentalnog zdravlja i prevencije mentalnih poremećaja, dijagnostike, liječenja i psihosocijalne rehabilitacije.

Za potrebe realizacije projekta *Vodoopskrba Brčko* koja podrazumijeva izgradnju glavnog transportnog cjevovoda Plazulje-Potočari i pripadajućih hidrotehničkih objekata za vodoopskrbu grada, prigradskih naselja i gravitirajućih industrijskih zona na području Brčko distrikta BiH s izvorišta Plazulje i dijela vodovodne mreže, Vlada je usvojila Odluku o zaduženju Distrikta po Ugovoru o zajmu između Bosne i Hercegovine i Europske banke za obnovu i razvoj na iznos od 6.500.000,00 EUR.

Spomenuti projekt *Vodoopskrba* sastavni je dio projektnog ugovora „Zeleni gradovi 2 Vodovod Brčko“ koji je potpisan u svibnju 2022. godine između Brčko distrikta BiH i EBRD-a, u sklopu programa „Zeleni gradovi“.

Vlada je ujedno započela 80. redovitu sjednicu odobrivši smjernice za izradu nacrtu Zakona o poduzetničkoj infrastrukturi u Brčko distriktu BiH, na prijedlog predstojnika Odjela za gospodarski razvitak, šport i kulturu.

Osnovni cilj ovog zakona je zakonsko reguliranje sustavna podrška jačanju konkurentnosti gospodarstva Brčko distrikta BiH u domaćim, regionalnim i globalnim lancima vrijednosti, u uvjetima rastuće digitalizacije i dekarbonizacije, te je nužno smjernicama propisati svrhu i sustav poduzetničke infrastrukture, način utemeljenja i uspostave kao i kriterije za kategorizaciju poduzetničkih zona i slično.

Na prijedlog prestojnika Odjela za prostorno planiranje i imovinsko-pravne poslove odobrena je Odluka o pristupanju izradi izmjena dijela Regulacijskog plana dijela stambenog naselja „Mujkići II“.

Spomenuta izmjena Regulacijskog plana provodit će se sukladno namjeni zemljišta predviđenim Izmjenama i dopunama Urbanističkog plana grada Brčko (II) plansko razdoblje 2007. 2017. godine, u smislu planiranja i izgradnje objekta Nastavnog školskog centra Uprave za neizravno oporezivanje BiH u Brčko distriktu BiH.





Održan sastanak između zvaničnika Distrikta i novoimenovanog ambasadora SAD u BiH

Gradonačelnik Brčko distrikta Bosne i Hercegovine Esed Kadrić i zamjenik gradonačelnika dr. Anto Domić zajedno s predsjednikom Skupštine Sinišom Milićem i potpredsjednikom Ivom Filipovićem, upriličili su prijem povodom posjete ambasadora Sjedinjenih Američkih Država u Bosni i Hercegovini Nj. e. Michaela J. Murphyja.

Radi se o nastupnoj posjeti ambasadora Murphyja,

koji je u februaru ove godine preuzeo novu funkciju. Zvaničnici su ambasadora upoznali s trenutnom situacijom u Distriktu i aktivnostima koje se provode. Ambasador Murphy je pohvalio rad brčanske izvršne i zakonodavne vlasti te je iskazao svoju nadu da će nastaviti pružati pozitivan primjer saradnje za ostvarivanje zajedničkih ciljeva kroz upravljanje i unapređivanje reformi.

Усвојена ранг-листа студената који су остварили право на стипендију

Влада Брчко дистрикта Босне и Херцеговине на наставку 80. редовне сједнице усвојила је Приједлог одлуке о усвајању коначне ранг-листе студената Брчко дистрикта БиХ који су остварили право на стипендију за период од 1. 1. 2022. године до 31. 7. 2022. године.

Шеф Одјељења за образовање Владе Брчко дистрикта БиХ Зоран Булатовић казао је да је ове године програмом обухваћено 200 студената.

„Када су у питању студенти првог циклуса, њих је укупно 188. Ове године први пут смо додијелили стипендије и студентима другог циклуса студија и њих је укупно 12. Такође, донесен је и закључак да се иде на доношење одлуке о проширеној ранг-листи студената јер нам је остало још 24 студента који испуњавају услове, али због лимитираног броја од 200 студената у овој одлуци нису обухваћени.

Надамо се да ће у неких наредних неколико дана бити процедурално све завршено како би и они ушли у програм стипендирања. Тиме би добили укупно 224 студента“, казао је Булатовић.

Он је подсјетио да су износи остали исти као и претходних година уз одређене измјене.

„На мјесечном нивоу издвојено је 200,00 КМ по студенту с тим што смо урадили и мале измјене у односу на претходни период. До сада је било да се стипендије исплаћују мјесечно, а сада смо донијели одлуку да се исплате обављају у двије транше, односно за првих седам мјесеци у једној транши исплатиће се 1400,00 КМ док ће се за прва три мјесеца нове академске године тј. октобар, новембар и децембар исплатити износ од 600,00 КМ“, казао је Булатовић.





Nastavlja se uspješna suradnja Brčko distrikta BiH i UNDP-ija u BiH

Gradonačelnik Brčko distrikta Bosne i Hercegovine Esed Kadrić i dopredsjednik Skupštine Ivo Filipović u prostorijama Skupštine održali su sastanak sa rezidentnom predstavnicom UNDP-ija u BiH gđom Stelianom Nederom, s kojom su razgovarali o provođenju trenutnog zajedničkog projekta poboljšanja energetske učinkovitosti javnih objekata, kao i budućoj suradnji.

„Brčko distrikt i UNDP u BiH imaju dobru suradnju dugi niz godina i imamo nekoliko aktivnih zajedničkih projekata koje provodimo. Trenutno nam je u fokusu projekt utopljanja javnih objekata, a radimo i na tome da preko UNDP-ija obavimo proceduru nabave izrade idejnog projekta „Centar za upravljanje otpadom“. Na taj način bismo iskoordinirali aktivnosti na zatvaranju gradske deponije i osposobili moderan centar za otpad na području Distrikta“, izjavio je Kadrić.

Rezidenta predstavnica Steliana Nedera iskazala je

svoje zadovoljstvo dosadašnjom suradnjom sa Brčko distriktom.

„Drago mi je da se rad na energetske učinkovitosti odvija dobro i radujem se što ćemo nastaviti i proširiti rad, ne samo na ovom projektu, nego i na projektu zbrinjavanja otpada“, kazala je Nedera.

„Zadovoljstvo mi je što smo ugostili rezidentnu predstavnicu i što je na redu utopljanje i obnova krova zgrade Skupštine čija će realizacija uslijediti čim dokumentacija bude spremna. Zgrada Skupštine je zaista u jako lošem stanju i to je velika stvar za Skupštinu, za zastupnike, a posebno za djelatnike odnosno stručnu službu Skupštine“, istakao je Ivo Filipović.

Sastanku su nazočili i predstojnik Odjela za stručne i administrativne poslove Nedim Hamzabegović kao i predstavnici Ureda za upravljanje javnom imovinom, nakon kojeg su obišli zgradu Skupštine.

Vlada usvojila prijedlog osnivanja Turističke organizacije Brčko distrikta BiH

Vlada Brčko distrikta Bosne i Hercegovine je na 81. redovnoj sjednici usvojila Odluku o osnivanju Turističke organizacije na prijedlog gradonačelnika i u skladu s Zakonom o pravnim licima koje osniva Brčko distrikt.

Kako je na konferenciji za medije kazao šef Zakonodavnog ureda Adnan Pašalić, ova turistička organizacija bi trebala započeti s radom od 1. 1. 2023. godine te je pojasnio njen način finansiranja. „U narednoj budžetskoj godini će se osigurati sredstva za rad iste, a osim budžeta, turistička organizacija bi se također finansirala od boravišnih taksi kao i kroz druge projekte koje bi ostvarila u saradnji s domaćim i međunarodnim strukturama“, izjavio je Pašalić, te dodao da će za smještaj

brčanske turističke organizacije biti osigurana atraktivna lokacija u centru grada.

On je kazao da će kadrovska struktura ove organizacije biti preuzeta iz postojeće Službe za turizam u Odjeljenju za privredni razvoj, sport i kulturu.

„Turistička organizacija će započeti rad sa 3 izvršioca, a onda će se u daljnjem periodu vidjeti da li će biti potrebe za povećanjem kadrovskih kapaciteta. Ovo je jako značajan projekat Vlade jer se ovakve investicije prepoznaju u regionu i šire, tako da će Brčko radi sve više na poboljšanju turističkih promocija i turističke ponude“, dodao je Pašalić.





Izložba „Tragom brčanskih Židova“ promovirana u Sarajevu

U organizaciji gradonačelnika Brčko distrikta BiH Eseda Kadrića i Službe za arhiv Odjela za javni registar Vlade Distrikta, zajedno sa Židovskom zajednicom u Bosni i Hercegovini, u prostorijama Galerije „Novi hram“ u Sarajevu otvorena je izložba „Tragom brčanskih Židova“, uz promociju istoimene monografije autorice i arhivistice Tamare Vijoglavine Mančić.

Ovom izložbom predstavljena su svjedočenja o životu i doprinosu Židova u Brčkom u pogledu ukupnog razvoja grada, čija je građa prikupljena iz Arhiva Bosne i Hercegovine, židovskih općina iz Sarajeva i

Beograda, židovskog tiska kao i od potomaka brčanskih židovskih obitelji.

Nazočnima su se, uz gradonačelnika Kadrića i autorice Vijoglavine Mančić, obratili i predsjednik Židovske zajednice u BiH Jakob Finci i voditelj Službe za arhiv Ćazim Suljević, ističući važnost ovog znanstveno-istraživačkog angažmana koji čini sastavni dio Sporazuma o međusobnoj suradnji potpisanog između Distrikta i Židovske zajednice u ožujku ove godine.

Promociji izložbe i monografije također je nazočio prvi zamjenik visokog predstavnika i supervizor za Brčko distrikt BiH Jonathan Menutti.

Svečano otvorena manifestacija Čari zime





U ime gradonačelnika Brčko distrikta Bosne i Hercegovine Eseda Kadrića manifestaciju Čari zime / Чари зиме svečano je otvorio šef Kabineta gradonačelnika Amir Softić.

“Nadamo se da će svi naši građani kao i gosti uživati u zimskim čarolijama na Trgu mladih u Brčkom uz bogat program i raznovrsnu ponudu domaćih proizvoda. Također, i ove godine građani će Novu godinu moći dočekati na Trgu mladih uz popularni bend “Galija”, kazao je Softić.

U okviru manifestacije Čari zime / Чари зиме svečano je otvoreno i

klizalište nastupom Kluba sportova na ledu UNITY iz Sarajeva.

Na manifestaciji sudjelovati mogu kompanije koje će izložiti svoju ponudu kao i udruženja sa svojim programom.

Manifestacija će trajati od 3. 12. 2022. do 31. 1. 2023. godine na Trgu mladih u Brčkom.

„Čari zime“ organizuje Vlada Brčko distrikta BiH s ciljem da se u zimskom periodu Trg mladih obogati raznim sadržajima za sve građane.

Facebook „Čari zime“ - <https://www.facebook.com/carizime>

Realizovan projekat vodosnabdijevanja MZ Brka i Industrijske zone McGovern u Brčkom

Radovi na projektu izgradnje infrastrukture, tačnije povezivanje MZ Brka i Industrijske zone McGovern na vodovodni sistem uspješno su okončani, te je na tom lokalitetu puštena u rad prepumpna stanica koju su obišli gradonačelnik Brčko distrikta BiH Esed Kadrić i šef Odjeljenja za komunalne poslove Majazudin Vehabović.

„Vlada je, od početka svog mandata, vodila računa da se intenziviraju aktivnosti na rješavanju problema vodosnabdijevanja u svim mjesnim zajednicama u kojima je to neophodno i bilježimo dobre rezultate. Ovdje smo da potvrdimo rješavanje pitanja vodosnabdijevanja Industrijske zone McGovern i MZ Brka, a uskoro ćemo pristupiti rješavanju ovog pitanja u Grbavici i u zapadnim mjesnim zajednicama“, izjavio je gradonačelnik Kadrić te je dodao da se aktivnosti oko izgradnje glavnog transportnog cjevovoda također privode kraju.

Šef Odjeljenja za komunalne poslove Majazudin

Vehabović istakao je važnost ovog projekta, u pogledu rješavanja dugogodišnjeg problema vodosnabdijevanja u MZ Brka. „Ukupna vrijednost ovog projekta iznosi oko 409.000,00 KM. Ova pumpna stanica obezbjeđuje dobar pritisak vode za građane Brke, a sastoji se od tri pumpe po 7,5 kW i svaka zasebno može da upumpa u sistem po 6,5 litara u sekundi, a to je mnogo više od projektovane potrošnje za ovo naselje koja iznosi oko 11 litara u sekundi“, objasnio je Vehabović.

Predsjednik MZ Brka Zehrudin Pekarić iskazao je svoje zadovoljstvo, kazavši da se radi jednom od najvećih urađenih projekata koji su realizovani posljednjih godina u MZ Brka.

„Ovom stanicom riješen je veliki problem koji smo imali na ovom području. Želim da se zahvalim Vladi Distrikta, posebno gradonačelniku Esedu Kadriću i šefu Majazudinu Vehaboviću koji su bili glavni akteri u realizaciji ovog projekta“, izjavio je Pekarić.





Usvojena Strategija razvoja poljoprivrede i ruralnih područja Brčko distrikta BiH za razdoblje 2021- 2027. godina

Vlada Brčko distrikta Bosne i Hercegovine na 84. redovnoj sjednici usvojila je prijedlog Odjeljenja za privredni razvoj, sport i kulturu a koji se tiče tekućeg transfera i Programa utroška sredstava u cilju provođenja statističkih aktivnosti od isključivog interesa za Brčko distrikt BiH, koje provodi agencija za statistiku BiH.

Time je odobren transfer od 100.000,00 KM Ministarstvu financija i riznice BiH, u svrhu provođenja integracije Zavoda za statistiku Brčko distrikta BiH u Agenciju za statistiku BiH u smislu preuzimanja poslova, opreme, finansijskih sredstava i uposlenih Zavoda za statistiku.

Na prijedlog istog Odjela usvojena je Odluka o dodjeli sredstava donacija Odjela za gospodarski razvitak, sport i kulturu za 2022. godine u ukupnom iznosu od 28.500,00 KM. Sredstava će biti dodijeljena Udruzi logističara *Trans logistic* Brčko distrikt BiH za realizaciju projekta pod nazivom „Poboljšanje uvjeta carinjenja i protoka roba u Brčko distriktu BiH”, Sindikatu Brčko distrikta BiH za realizaciju projekta pod nazivom „Zajedno do boljih prava”, te Udruzi poslodavaca Brčko distrikta BiH za realizaciju projekta pod nazivom „Unapređenje poslovnog okruženja”.

Vlada je usvojila Odluku o dodjeli sredstava za financiranje i sufinanciranje programa odnosno projekata od javnog interesa u Odjelu za europske

integracije i međunarodnu suradnju za 2022. godine u ukupnom iznosu od 35.174,00 KM.

Sredstva se dodjeljuju: Udruzi za razvoj potencijala djece i mladih „Rastimo“, za program/projekt „Škola kao sigurno mjesto pilot projekt“, Udruzi Art Centar Ankata, za program/projekt „Škola životnih vještina“, Udruzi građanin „Demos“, za program/projekt „Znanje u službi razvoja zajednice po standardima Europske unije“, Udruzi „Proni Centar za omladinski razvoj“ za program/projekt *Be Well Digital*, Udruzi mladih „Trka za život“ za program/projekt „Razbijanje mitova predrasuda o EU“ te Udruzi građanin „Sektor“ za program/projekt „Promocija programa jednogodišnjeg školovanja učenika iz Brčkog u zemljama EU (razmjena učenika srednjih škola)”.

Također, na prijedlog Odjela za poljoprivredu, šumarstvo i vodno gospodarstvo usvojena je *Strategija razvoja poljoprivrede i ruralnih područja Brčko distrikta BiH za razdoblje 2021. 2027. godine*. Radi se o strateškom dokumentu kojim će se dati jasne smjernice aktivnosti i prioritetni smjerovi djelovanja u domenu ruralnog razvoja i poljoprivredno-prehrambenog sektora, a koji je nastao u okviru FAO projekta „Podrška pripremi izrade Strategije razvoja poljoprivrede i ruralnih područja Brčko distrikta”.

Usvojena Odluka o visini novčane pomoći uposlenicima uslijed rasta potrošačkih cijena

Na nastavku 84. redovite sjednice, Vlada Brčko distrikta Bosne i Hercegovine usvojila je prijedlog Direkcije za financije koji se odnosi na Odluku o visini novčane pomoći zaposlenicima uslijed rasta potrošačkih cijena u Brčko distriktu BiH za 2022. godinu.

Janja Geljić, v. d. ravnateljice Direkcije, kazala je u svom obraćanju medijima da se radi o novčanoj pomoći koja ne podliježe oporezivanju i ne smatra se dohotkom od nesamostalne djelatnosti.

„Visina novčane pomoći utvrđena ovom Odlukom iznosi do 1.400,00 KM na račun zaposlenika, a novčanu pomoć poslodavac može isplatiti isključivo do 31. 12. 2022. godine. Ova Odluka stupa na snagu danom donošenja“, izjavila je ravnateljica Geljić.

Ona je pojasnila da su poslodavci, u slučaju isplate novčane pomoći, dužni da Poreznoj upravi dostave obavijest o visini isplaćene novčane pomoći do 10.

siječnja 2023. godine sukladno s Pravilnikom o primjeni Zakona poreza na dohodak koje treba da sadrži: naziv i JIB poslodavca, iznos isplaćene novčane pomoći zaposleniku, ukupan broj zaposlenika kojima je isplaćena novčana pomoć te ukupan iznos isplaćene pomoći.

Također, na današnjoj sjednici usvojen je Program utroška sredstava donacija gradonačelnika Brčko distrikta Bosne i Hercegovine za 2022. godinu namijenjenih fizičkim osobama koji se nalaze u teškom materijalnom stanju.

Na prijedlog Odjela za obrazovanje Vlada je usvojila Prošireni popis studenata Brčko distrikta Bosne i Hercegovine koji su ostvarili pravo na stipendiju za razdoblje od 1. 1. 2022. do 31. 7. 2022. godine kojom će još 32 studenta ostvariti pravo na dodjelu stipendije.



Потписан Уговор о гранту за „Луку Брчко“



Координатор Владе Брчко дистрикта Босне и Херцеговине при Савјету министара БиХ Мирослав Гаврић у име градоначелника Брчко дистрикта БиХ, присуствовао је потписивању Уговора о гранту за Луку Брчко, заједно са директором ЈП „Лука Брчко“ Перицом Јосићем.

Уговор су, у Сарајеву, потписали замјеник предсједавајућег Савјета министара Босне и Херцеговине и министар финансија и

трезора Вјекослав Беванда и директорка Канцеларије Европске банке за обнову и развој у БиХ Мануела Несл (Manuela Naessl). Потписаним грантом обезбијеђена су средства у вриједности од 3.000.000,00 EUR намијењених за модернизацију брчанске луке, односно за рехабилитацију друмског и жељезничког приступа истој те за модернизацију њене инфраструктуре.



Одобрен Program utroška sredstava donacija sportskim klubovima

Vlada Brčko distrikta Bosne i Hercegovine održala je 25. izvanrednu sjednicu na kojoj je usvojena Odluka o odobravanju Programa utroška sredstava donacija sportskim klubovima u Odjelu za gospodarski razvitak, šport i kulturu po javnom pozivu. Korisnici sredstava po ovom Programu su: FK „Izbor“, FK „Gornji Rahić“, KMF „Beli anđeo“, Muški rukometni klub „Lokomotiva“ Brčko, FK „Omladinac Potočari“, Taekwondo klub „Brčko“, ŽOK „Bimal-Jedinstvo“, OSK „Talent“, FK „Ilička 01“, KMF „Brčko Zdravlje“ i FK „Posavina Brod“. Ujedno, usvojena je Odluka o Programu utroška sredstava donacija za neprofitne organizacije iz oblasti sporta i kulture, u Odjelu za gospodarski razvitak, šport i kulturu, po Javnom pozivu za korisnika Centar za arheološka i etnografska istraživanja „Neolit“ Brčko.

Na prijedlog Odjela za javnu sigurnost usvojena je Odluka o odobravanju Programa utroška sredstava za financiranje i sufinanciranje projekta udruga od javnog interesa u Odjelu za javnu sigurnost za 2022. godinu u ukupnom iznosu od 100.000,00 KM. Svrha programa je financiranje projekata kojima se razvija brzi odgovor na prirodne i druge nesreće, unapređuje suradnja s nevladinim organizacijama u oblasti zaštite i spašavanja i poboljšanje efikasnog odgovora na nesreće kroz suradnju tijela i institucija Brčko distrikta Bosne i Hercegovine i nevladinih organizacija.

Također, Vlada je odobrila dodjelu novčanih sredstava za financiranje i sufinanciranje projekta od javnog interesa u Odjelu za javnu sigurnost za 2022. godinu, u ukupnom iznosu od 86.902,00 KM, i to za: UG Vatrogasno društvo „Slobodna zona“

Maoča, Brčko za projekt „Nabava opreme 2022“, Crveni križ/krst Brčko distrikta BiH za projekt „Nabava šatora“, Gorska služba spašavanja za projekt „Jačanje kapaciteta GSS za aktivnije učešće u lokalnoj zajednici“, Auto moto klub „4x4“ Brčko za projekt „Jačanje kapaciteta udruga u svrhu opće društvene sigurnosti“, Nautički klub „Moja lađa“ za projekt „Građani u službi sigurnosti“, Vatrogasno društvo Gornji Rahić za projekt „Poplava i požari“, Vatrogasno društvo „Sveti Florijan“ za projekt „Zaštitimo našu sredinu“, Vatrogasno društvo Brčko za projekt „Vatrogasac Spasilac II“, UG „X Centar“ za projekt „Suočimo se s prirodom Pobjedimo nepogode“, NVO Posavina bez mina za projekt „Jačanje tehničke opremljenosti organizaciji za provođenje terenske aktivnosti s ciljem efikasnijeg i transparentnijeg upravljanja deminiranog zemljišta na području Brčko distrikta BiH“, te Forum mladih za demokraciju za projekt „Opremljenošću do opće sigurnosti“.

Usvojen je prijedlog Odjela za komunalne poslove koji se tiče dodjele kapitalne donacije JP „Komunalno Brčko“, za izgradnju NN mreže od „Biljane“ prema Kljenovcima u MZ Maoča u iznosu od 15.000,00 KM kao i donacija za izgradnju dijela vodovodne mreže u MZ Grbavica u visini od 20.000,00 KM.

Na prijedlog Odjela za poljoprivredu, šumarstvo i vodno gospodarstvo usvojen je Cjenik šumskih proizvoda na području Brčko distrikta BiH kao i Odluka o usvajanju Glavnog operativnog plana obrane od poplava Brčko distrikta BiH za 2023. godinu.

Gradonačelnik obišao izvršene radove u okviru programa stambenog zbrinjavanja Roma u BiH

Gradonačelnik Brčko distrikta Bosne i Hercegovine Esed Kadrić obišao je izvršene radove na stambenim jedinicama u okviru programa stambenog zbrinjavanja Roma u BiH koji Vlada Distrikta Odjeljenje za raseljena lica, izbjeglice i stambena pitanja implementira udruženim sredstvima sa Ministarstvom za ljudska prava i izbjeglice BiH.

U okviru programa izvršeni su radovi na ukupno 11 stambenih jedinica u 2022.

godini, od kojih su 2 novoizgrađene u naseljima Prutače i Grbavica, i 9 saniranih stambenih jedinica u naseljima Suljagića Sokak i Broduša. Za potrebe radova izdvojeno je oko 400.000,00 KM, a korisnici programa su odabrani po javnim pozivima iz prethodnih godina. Obilasku su također prisustvovali predstavnici Odjeljenja i državnog ministarstva, koji su ujedno izvršili nadzor nad izvršenim radovima.

Ibrahimović: Podsjećamo na poštovanje Uputstva o radu u danima praznika

Glavna inspektorica Inspektorata Brčko distrikta Bosne i Hercegovine Azijada Ibrahimović obratila se medijima kako bi se javnost upoznala s Uputstvom o radu u danima praznika u Brčko distriktu BiH kojim se uređuje rad svih institucija i organa javne uprave Distrikta, preduzeća, preduzetnika i drugih pravnih lica u dane praznika radi zadovoljenja neophodnih potreba građana na području u Brčko distriktu BiH. Ona je podsjetila na Zakon o praznicima Distrikta, kojim su utvrđeni praznici, a to su Nova godina, Dan Distrikta i Praznik rada.

„Što se tiče rada za vrijeme ovih praznika, pojasnit ću: mogu raditi subjekti odnosno preduzeća koja pružaju medicinske, zdravstvene, veterinarske usluge, koja obavljaju pružanje apotekarskih usluga s tim da, ukoliko imaju više poslovnih jedinica, može da radi samo jedna poslovna jedinica, zatim ona koja obavljaju djelatnost proizvodnje i prodaje hljeba, peciva i ostalih pekarskih proizvoda. Nadalje, trgovina na malo motornim gorivima i mazivima, a to su benzinske pumpe, zatim subjekti koji obavljaju komunalnu djelatnost i djelatnost prevoza putnika, ugostiteljska djelatnost i subjekti

koji obavljaju djelatnost čija priroda zahtijeva neprekidan rad“, izjavila je inspektorica Ibrahimović.

Ona je istakla da je Uputstvom definisana dužnost šefova nadležnih odjeljenja: Odjeljenje za javnu sigurnost, Odjeljenje za zdravstvo i ostale usluge, Odjeljenje za javne poslove, Odjeljenje za javni registar, kao i druge institucije, da organizuju dežurstva i da osiguraju kontinuitet zadovoljavanja osnovnih vitalnih potreba u Distriktu.

„Budući da je Inspektorat određen za vršenje nadzora nad Zakonom o praznicima Distrikta, inspektori rada će u neradne dane vršiti kontrole. Napominjem i kazne koje slijede u slučaju kršenja Uputstva koje su visoke, pa tako recimo, ukoliko je način organizovanja nekog subjekta nadzora pravno lice, kazne se kreću od 5.000 KM do 10.000 KM. Također se kažnjava i odgovorno lice u pravnom licu i kazna se kreće od 1.000 KM do 2.000 KM, kažnjavaju se i fizička lica koja obavljaju djelatnost za radi sticanja dobiti, to su samostalni preduzetnici, a donja kazna ili minimalna kazna je od 2.000 KM do 4.000 KM“, dodala je glavna inspektorica Ibrahimović.





Kancelarija gradonačelnika, Sekretarijat Vlade Brčko distrikta BiH,
Sektor za informisanje Vlade Brčko distrikta BiH
Bulevar mira 1, 76100 Brčko distrikt BiH

vlada.bdcentral.net